



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



Tir Yimiyim



tir_yimiyim



tir yimiyim

TAPAK 7

38th National Games: Ashi Chouskey-i national record yanglu

Trump ajurui Israel PM Netanyahu ayamesogo

VOL. XXII ISSUE NO. 110 (ADOK 110)

DIMAPUR TENTONÜ (MONDAY)

TSÜKLAI (FEBRUARY) 03, 2025

₹ 5.00

Shashi Tharoor-i Hinduism indang jembii

New Delhi, February 2, 2025

(Agencies): Nisung kari Hinduism dak alaka kecha mali ama inyaksangshir aser British football nung ozüing alema inyaksangshiba mesüka lir. Item nisungtem yagi parnok pusema menungitertem dak teka sangshir ta Congress MP Shashi Tharoor-i ashi.

"Parnoki Hinduism ya British football nung ozüing alema inyaksangshiba maitsü mesüka kümdaktsür. Nenoki onok pusema menungitra azüksü, nenoki Jai Shri Ram meshira azüksü ta parnok ashir. Ibaji Hinduism masü aser Hinduism den tesentakpe kecha mali" ta Tharoor-i ashi.

Swami Vivekananda-i "Hindu nungeri kodanga bushisingdangba mi mapotsü" ta

ashiba olen Tharoor-isa nenshia metetdaksü. Jaipur Literature Festival nung jembidang Congress lennir Tharoor-i iba ya ashi.

Hindu nunger tajung ka akümsü atema lenmang pezü lir aser itemji Gyana Yoga, Bhakti Yoga, Raja Yoga aser Karma Yoga lir ta paisa ashi.

"Gyana Yoga ya azüingba aser angazükba ajanga tanüla tangatetbatem meteter. Bhakti Yoga ya nisung teimba inyaker aser iba sülen Raja Yoga lir. Iba ajanga pei sasa bushiba aser pei dak ochi metettsü merangba lir. Tatamsa Mahatma Gandhi-i kanga dang benshiba Karma Yoga lir aser iba ya meimchir yariba ajanga Tsüingrem külemba lir" ta Shashi Tharoor-isa metetdaksü.

HNLC-i Sixth Schedule aser Article 371 aitsür

Shillong, February 2, 2025

(Agencies): Meghalaya nung Hynniewtrep National Liberation Council (HNLC)-i Sixth Schedule aser Article 371 aitsüogo.

Hynniewtrep nunger ashioktsütsü aser alenbanga ayutsü atema item ya "political" sangtem lir ta HNLC-i ashi.

"Item ozüingtem ya teka alenbanga ayutsü atema latetba lir, Item ozüing ya tiyazü tashi agütsüba den India-i amokbanga ayutsü yangluba lir" ta HNLC general secretary Saiñkupar Nongtraw-i ashi.

India sorkari Hynniewtrep lima agizüktsü memulungba ajanga parnok nendaka

meinyakba tatishitsü sayur, ta pai ashi.

Sixth Schedule kübok Hynniewtrep tesem ajak madener aser Article 371 meshiba ajanga linük madak tashi tera dang angutsü ta Nongtraw-isa ashi.

"JJM Nichols Roy-i Syiemship tashimait kümdaktsü aser Hynniewtrep nungeri pei sasa ketdangtsütsü tashi agien" ta HNLC general secretary-isa ashi.

"British yimsüsüba mapang par yimli wazüka ayutsü atema lisopur yimlitem samatsü aser yimsüsürtem tenüing atema lennirtem dang kümdaktsüba mesüka lir" ta Nongtraw-isa ashi.

Delhi nung Arunachal Sadan lapokogo

Itanagar, February 2, 2025

(Agencies): Dwarka, New Delhi nung tawa tasen lapokba Arunachal Sadan ajanga Arunachal Pradesh nunger Delhi semdangdang teyari tulu angutsü.

Chief Minister Pema Khandu den Union Minister Kiren Rijiju nati Arunachal Sadan lapokja liasü aser iba ya kaketshirtem, shirangertem aser ketdangsurtem anenzüktsü atema yangluba lir.

Arunachal Sadan tasazük ya 1,750 square metres lir aser deluxe rooms 41, conference hall ka, dining facilities, medical room ka aser modern security measures enoka lir.

Iba ki nung car lifts, parking, CCTV, aser fire detection systems enoka lir aser tamongertem kümzüka ayuba den anisüngzük angutsü. Talisa iba ki ya ISKCON Temple, metro

stations, aser airport anasa lir.

"Arunachal Sadan tasenba ajanga linük yimtibai aruba sensotem anepalutsü. Tang aliba Arunachal Bhawan aser Arunachal House den külemi iba ki tasenba nung nübertem anenzüktsü" ta Resident Commissioner Amjad Tak-i ashi.

Delhi nung Arunachal Pradesh nunger anisüngzük mongdaktsütsü atema Arunachal Sadan yangluogo aser maneni Arunachal Bhawan o Arunachal House yanglushiba maparen tatembangleni arudar.

Arunachal Pradesh sorkari Delhi nung aliba sensotem nem facilities tajungba agütsütsü merangba nung Arunachal Sadan ya dena lir. Arunachal Pradesh nunger pei ki toktsür oa linük yimtiba nung alidang anenzüktsü atema iba ki yanglutsüogo.

US-i import tariffs tasen latetba nung India medensem



New Delhi, February 2, 2025

(Agencies): US President Donald Trump-i mezüingbuba tariffs latetba osang metetdaksüba nung India maden.

Trump-i sangdongba nung Mexico, Canada, aser China linüktem dena lir aser parnok shishilembaba nung tagütsütsü aika lir ta pai ashi.

February 4, 2025 nungi mapa tenzüksüba tax/duty tasenba latetba nung Canada aser Mexico dang 25% aser China dang 10% tariffs agütsü lateta lir. US den shishilembaba nung sen tajemba agütsüba linüktem dak rangloker Trump'er sorkari tariffs tasen latetogo.

China-i 30.2%, Mexico-i 19% aser Canada-i 14% trade deficit lir. India-i 3.2% dang agütsür aser US den shishilembar rongnung 9 buba lir, ta Research and Information System (RIS)-i metetdaksü.

"Onoki linük asem den trade deficit lir. Linük katibo fentanyl aika yoker aser iba ajanga kümshia nisung meyrjang aika asür. Külen linük ana jagi US telungi fentanyl aيتدaktsür. Canada den \$200 billion deficit aser Mexico den \$250 billion trade deficit lir" ta Trump-i ashi.

Iba osang sangdongba sülen Canada Prime Minister Justin Trudeau aser Mexico President

Claudia Sheinbaum nati Donald Trump den toktepa tariffs tasen latetba metetdaksüogo.

Külen, China-ia World Trade Organization (WTO) nung Trump-i tariff lemtet agiba anema ken o benoktsü metetdaksüogo. Iba ya international trade rules alema lir ta China-i ashir.

Canada-i C\$155 billion alang US imports nung 25% tariffs agütsü. Mongulbar nungi tariffs C\$30 billion mapa küma tenzüksü aser anogo 21 tsüingda tanüingba tariffs agütsü ta Canada Prime Minister Trudeau-i metetdaksüogo.

"Ni tariffs latetba ajanga America nungeri rongsenketzüng tsütsü timtem ajurutsü saka iba ajanga US nunger taginüba kümzüka ayutsü" ta President Donald Trump-i Deobarnü ashi.

Trump-i International Emergency Economic Powers Act nung ajemdaker tariffs latet.

"Iba ajanga timtem alitsü asü? Hao, alitsü akok (malitsü akok) saka onoki America maneni tulu kümdaktsütsü" ta Trump-i ashi.

PM Modi-i tax cuts tebilemba nungit: FM Sitharaman

NEW TAX REGIME

EXISTING TAX SLABS		PROPOSED TAX SLABS (Budget FY26)	
Total Annual Income	Rate of Tax	Total Annual Income	Rate of Tax
Up to ₹3 lakh	Nil	Up to ₹4 lakh	Nil
₹3 to 7 lakh	5%	₹4-8 lakh	5%
₹7 to 10 lakh	10%	₹8-12 lakh	10%
₹10 to 12 lakh	15%	₹12-16 lakh	15%
₹12 to 15 lakh	20%	₹16-20 lakh	20%
Above ₹15 lakh	30%	₹20-24 lakh	25%
		Above ₹24 lakh	30%

*Total Annual Income after excluding standard deduction of Rs 75,000

New Delhi, February 2, 2025

(Agencies): Prime Minister Narendra Modi-i tax cuts tebilemba pusema nungit ta Finance Minister Nirmala Sitharaman-i Deobarnü ashi.

Sitharaman-i Honibarnü middle class atema tax cuts tulu kar metetdaksüogo aser 'Viksit Bharat' kübok rongsenketzüng tsütsü temelenshi bener arutsü ashi.

"PM Modi-i langka ka inyaknüba shiogo. Pai ministry nem temelaba agütsü aser iba ajanga onoki ketdangsurtem dangi tebilemba aben. Anungji mapa talila inyaksü nüngdaka aküm" ta Sitharaman-i ashi.

Union Budget 2025 nung kümshia Rs 12 lakh tashi dang

aazükertemibo income tax kecha magütsütsü lateta lir.

Centre sorkari ita nung Rs 1 lakh angurtem indang tax khuret ajemtsütsü mechi nung income tax exemption Rs 7 lakh nungi Rs 12 lakh melenshiogo ta Union finance minister Nirmala Sitharaman-i ashi.

Sorkari income levels ajak nung tax agütsürtem anisüngzükdaktsütsü atema tax slab rates ajema kümdaktsür aser tax brackets ulushir ta laisa ashi.

Sitharaman-i Union Budget tibuba benokba nung limit adena aazükertem asoshi tax slabs meyipa repringshiogo. Kümshia Rs 25 lakh tashi aazükertem tax agütsüba nung Rs 1.1 lakh shi

ajangzüktsü.

Iba tax limit atuba ajanga nisung crore 1-i income tax magütsütsü. Iba temelenshi ajanga tax agütsür nisung 6.3 crore ajangzüktsü.

"Iba inyakyim tasenba ajanga middle class dang tax agiba ajemtsü aser parnok ket nung sen teimba anüngtsü" ta Sitharaman-i Lok Sabha nung Union Budget sayadang ashi.

Prime Minister Narendra Modi-i iba ya "people's budget" ka lir ta metetdaksüogo.

"Budget ajanga sen rizüingtsü tamendakdak agütsür aser terenlok mapa nung sensotem teyariteper kümdaktsür" ta PM Modi-i ashi

Chümoukedima nung angati Career Guidance Talk ayongzük



Dimapur, Tsüklai/February 02 (TYO): NITI Nagaland ajanga CTC Hall, Chümoukedima nung February 1, 2025 nü angati Career Guidance Talk ayongzük liasü.

Küm 25 tsüngta iba ama sentong tang mezüngbuba ayongzük, kong kaketshir, tsürabor, tesayur aser nübür lenirtem tejangraba tulu nung arua aden.

Iba sentong nung tongti tesemdanger ka ama Chairperson, Chümoukedima Town Council (CTC), Lhousito Khro-i jembidang, NITI Nagaland ajanga kanga nüngdaka aliba sentong ayongzükba asoshi tenüngsang agüja liasü.

Paisa Youth Icons of Nagaland ana shisalen sayur ama sentong nung shilem agiba atema pelaba lemsatep aser iba amala sentong ya ajanga kaketshirtem pei wadang shimtsü metetba nung yaritsü, ta ashi.

Paisa tarutsü nung NITI Nagaland ajanga sentong tuluba ayongzükra CTC-i yaritsü mulunga lir ta ashi.

Iba seminar nung Godwin Hr. Sec. School, Mount Mary Hr. Sec. School, North Town Hr. Sec. School aser school dangatem nung Class IX nungi XII tashi azünger kaketshir 120 dak tema dena liasü. Iba den NEET & JEE repeaters, tsürabor, STEM tesayur, nübür lenirtem aser

NGO nungi teshimtet nisungtem aden.

Iba sentong nung shisalen sayur ya Er. Rishav Sethi, CEO, NITI Nagaland aser Pangerkumzuk Longkumer, Cybersecurity Expert & Entrepreneur liasü. Tenaprong ya tawa Bharat Mandapam, New Delhi nung Viksit Bharat indang Young Dialogue Forum alidang shilem agia liasü.

Er. Rishav Sethi-i iba sentong nung NEET & JEE ajanga Medicine aser Engineering nung career yanglutsü aliba indang angatetdakja liasü. Pai FIITJEE indang School Integrated Program in Delhi nung ajangshiba athishia

structured program tem azüngtsü tongtipang lir ta ashi.

Nagaland nungi lanurtem IITs aser AIIMS ama reju tajung nung azüngtsü asoshi renemshiba nung mapang aser sen meindoktsü atema pai rasaa ashi.

Pai ano STEM education nung maongka jenti aliba indang jembi aser kaketshir dang kera nükjidong ayuba nung tajangzük lir ta ashi.

Nübürtemi kanga junga meteta alisang cybersecurity expert, entrepreneur, ethical hacker aser educator Pangerkumzuk Longkumer-i iba sentong nung 'emerging cybersecurity trends' aser 'ethical hacking' indang jembi liasü.

P a n g e r k u m z u k Longkumer ya Arts background nungi süaka pa sasa cybersecurity tsütsü mongin akum, aser pa takum otsü ajanga kaketshir aika ajungmesoa liasü.

Tanü putu nung cybersecurity experts tem tali nüngdaka akumba indang pai rateta ashi aser "STEM ya academics indang kisung masü saka asangsang nung tebilemtsü bentetba indang lir," ta pai ashi.

Artificial Intelligence nunga süang, cybersecurity mesüra engineering nunga süang, tarutsü lima ya tasen purapiteta tensa den lirumedema alitsü mulunga alir meyong lir, ta pai ashi.

Nexus Cipher Guard India indang founder ka ama pai penetration testing, website security aser digital threat training indang lemsatepa liasü.

Iba sentong Fr. Chacko Karinthiyal-i sarasadema tenzük aser Ajay Sethi, MD, NITI Nagaland ajanga melepzüng o jembi liasü, kong Pallavi Acharjee sentong anir liasü.

Senior GB aser Chairman, Chümoukedima Village, Akung-i tarutsü nunga iba ama sentong ayongzük kaketshirtem lenmang shidak nung anidaktsüner ta ashi.

Iba sentong nung Moasenla Jamir, Vice-Chairperson, CTC; Keviseno Kruse, Councillor, CTC; Rosy Yanthan, President, Lotha Women Hoho; Lokyunglo Lotha, President, Titipen Cultural Group; NGO nungi Prem Kothapalli aser school balala aser NITI Nagaland Team Members tem dena liasü.

INDIAN OIL CORPORATION LIMITED

(Marketing Division)

Advertisement No. IOCL/MKTG/HO/REC/2025

Pura India Open Recruitment ase Experienced aru Non-Executive category te thaika personnel khan karone, aru Special Recruitment Drive [SRD] ase Benchmark Disabilities [PwBD] thaika manu khan karone Non-Executive category te.

IOCL ekta puraani aru biyaalga energy company ase, jun oil, gas, petrochemicals aru alternate energy sources te kaam kure. "Maharatna" status paiki, etu organization desh laga energy bhoot dibi ase aru laga vision ase ki etu "India laga Energy" aru "Ekta Globally Admired Company" hobo.

Aage anibole karone, IOCL India laga nagorik thaika bright, young aru energetic manu khan laga application nimite invite kure, various post laga selection kame Grade-I pay scale Rs. 23,000-78,000/- aru Grade-III pay scale Rs. 25,000-1,05,000/- te, Marketing Division te, jun ki India laga alag-alag state te thaka installations/ Offices khan karone ase. Pay scale hishap te basic pay ke alawa, company laga niyam hishap te time-to-time anibi benefit aru compensation bhi dibi ase, juntu Dearness Allowance, House Rent Allowance, Medical Reimbursement, Leave Travel Concession, Superannuation Benefits, aru bhi anik benefit khan milibo.

Detailed advertisement, jun te post laga total number, reservation, educational qualification, experience criteria, selection laga method, aru baki criteria/parameters khan ase, etu sabo karone IOCL laga official website www.iocl.com te available ase. Detailed advertisement refer kuribo aru online apply kuribo karone, www.iocl.com visit kuri, 'Indian Oil For You' te jaabi > 'IndianOil For Careers' click kuribi > 'Latest Job Opening' te jaabi > 'Recruitment of Non-Executive Personnel in Marketing Division-2025' select kuribi.

Post-wise position laga summary nimi te notification dibo ase:

A) Pura India Open Recruitment ase Experienced Personnel khan karone Non-Executive category te.

Post Code	Grade	Name of Post*	Total no. of Positions
101 to 123	Gd.-I	Junior Operator	215

* SC/ST/OBC (NCL)/EWS/ExSM karone reserve kora position khan nimite, jun ki Government laga directives aru baki instruction hishap te ase, detailed advertisement refer kuribi.

B) Special Recruitment Drive [SRD] to sirf Benchmark Disabilities [PwBD] thaika manu khan karone ase Non-Executive category te.

SRD - Posts Reserved only for PwBD			
Post Code	Grade	Name of Post	Total no. of Positions
201 to 204	Gd.-I	Junior Attendant	23
205 to 208	Gd.-III	Junior Business Assistant	08

Mukhya tareekh khan yaad rakhibo

Activity	Dates
Online Application khulibo laga date:(website link: https://iocl.com/latest-job-opening)	03.02.2025 (10.00 Hrs)
Last date of submission of Online Application, Document Upload and Payment of Admission Fees	23.02.2025 (23.55 Hrs)
Computer Based Test (CBT) laga tentative month:	April, 2025
Computer Based Test (CBT) result publish kura (SPPT/CPT karone shortlist) laga expected schedule: https://iocl.com/latest-job-opening	April/ May 2025

Budget session nung NPP legislator tem opposition nung amentsü

Imphal, Tsüklai/February 02 (Agencies):

12th Manipur Legislative Assembly indang session 7 buba February 10 nungi tenzüktsü aliba nung National People's Party (NPP) legislator tem opposition bench nung mendaktsütsü, ta Manipur Speaker Thokchom Satyabrata Singh-i ashi.

Deobarnü Mayang Imphal nung osangbener den jembidang, NPP National President Conrad K. Sangma aser par party-i Manipur nung BJP sorkar bhusemba amentsü akhangba ama iba mera ya agitsü ta pai ashi.

Meghalaya Chief Minister Sangma-i aniba NPP yagi November 17, 2024 nü Manipur nung BJP-i aniba sorkar nung madentsü ta sangdong aser Chief Minister Biren Singh-i aniba Manipur sorkari state nung akhi tensa dangi

khenyongi bener maruteter ta shia liasü.

Taoba Manipur assembly elections nung NPP-i menden 7 nung takok angu, saka züngsem ka mapang talangka shiranga arur tawa asü.

Ajisüaka NPP ainshiba ajanga Chief Minister Biren Singh-i aniba Manipur sorkar manokshitsü, kechiaser züngsem 60 aliba Assembly nung BJP indang MLA 37 lir.

Iba den ano BJP sorkar nung Naga People's Front (NPF) nungi MLA pongu aser Independent nungi MLA asem lir.

Manipur nung May 3, 2023 nü kin balala tsüngta azüdokshi tenzükba sülen Kuki-Zo tribal legistalor ter Assembly session nung madener aser state nung tribal pur atema administration balaka mesüra Union Territory agüjang ta akhanger.



Dimapur, Tsüklai/February 02 (TYO): North Town Higher Secondary School, Chümoukedima nungi Class XII Science azünger Kelen Chang nem NITI Nagaland ajanga smart mobile phone ka 'lucky winner' ama agüja liasü. Iba sempet ya 2025 küm JEE azüngtsü janrar ajungmesoa January 2025 nung iba tatidang agütsür alirtem rongnungi shimteta agüja liasü.



New Delhi, February 02, 2025: Delhi nung assembly election agitsü anogo asemnü dang lia Union Home Minister, Amit Shah-i Delhi yimti tezülen aliba yimtsüngtem nungi telok ka ajurua senden amendang tangokba noksa nung angur.

Budget ajanga kibong ajak nem tepela bener arutsüogo: PM Modi

New Delhi, Tsüklai/February 02 (Agencies): Union Budget tenüngsanga Amongnü Ato kilonser, Narendra Modi-i, "Iba budget ya India nunger puti otsü nung middle class kibongtem atema budget tajungtiba lir; iba ya ajanga kibong ajak nem tepela bener arutsüogo," ta metetdaksü.

February 5 nü Delhi nung assembly election agitsü lia Amongnü election nüboyim sentong ka nung jembidang Ato kilonser, küm ka nung sen lakh 12 tashi dang income angurtem dang nungi saru magitsü, aser iba ya India nunger nüchiso anguba sülen tajangzük tulutiba agütsüba asütsü, ta metetdaksü.

"Yashi budget benokba mapang nungi middle class kibongtemi iba ya India nunger puti otsü nung middle-class atema budget tajungtiba lir, ta ashir. India nung kibong ajak pelateper. Sen lakh 12 tashi

income angurtem dang nungi ozü sorkari saru magitsü. India nunger nüchiso anguba mapang nungi küm ka nung sen lakh 12 tashi income angurtemi income tax nungi anisüngzük mengui liasü," ta pai metetdaksü.

"Jawaharlal Nehru mapang nungi sen lakh 12 tashi angurtemi shilem pezüsü nungi kabo saru agüja liasü. Tanü Indira Gandhi sorkar ali asü nunga sen lakh 12 nungi lakh 10 bo sorkar nem saru agütsüla. Küm 10-12 tejaklen-a Congress mapang nung na itasen sen lakh 12 angu nunga sen 2,60,000 bo saru agütsü. Ajisüaka yashi BJP sorkari budget benokba sülenbo sen lakh 12 angurtemi saru senjang kata magütsütsü," ta paisa metetdaksü.

Delhi nung Aam Aadmi Party sorkar aija Modi-i, AAP-i tiyazü nangzük aser ochimashi inyaker, aser ibaji ajanga linük yimtiba nung factory aika shibangogo, ta ashir.

"Külen nüburtem anemba party lir aser külen 'Modi tenangzükbatem' lir," ta pai ashi.

Ato kilonseri, Centre sorkari tongshi pezü tashi itdaksütsü atema rangloker inyaker, aser item tongshiji sensakertem, aluyimertem, lanurtem aser tetsürtem lir, ta ashir.

Iba Budget ajanga item tenangzükba inyaksütsü, ta pai ashi.

"February 8 nü Delhi nung BJP sorkar akümtsü aser March 8 nü International Women's Day anogomong nungi tetsürtem nem sen 2,500 agütsütsü," ta pai ashi.

AAP tongti lenir aser taoba chief minister Arvind Kejriwal aika Modi-i, "Glass agi yangluba tamarener kidang alirtemi sensakertem ki aser middle class kibongtem 2BHK ki den medem dangtsü makok," ta ashir.

"Tetsübu nung AAP-i anogo shia taila tenangzükbatem sangdonger," ta paisa shisem.

Kejriwal-i New Delhi constituency atema Independent Observers meshir

New Delhi, February 02 (Agencies): Delhi assembly election jakdang AAP tongti lenir, Arvind Kejriwal-i, par party nung inyakerter amaker, ta shia Election Commission dang New Delhi constituency atema independent observers shimtsüla, ta takhangba agütsü.

Shidi ka ajanga Election Commission dang Kejriwal-i, party nung inyakerter amakba nung shilem agir BJP nung inyakerter aputsüla aser police ketdangsertem anentsütsüla, ta ashir.

Kejriwal-i aitsüba dak sendakba nung tang tashi nungbo BJP mesüra Delhi Police-i telangzüba kecha magütsü.

Taoba mapang Delhi chief minister-isa New Delhi constituency nung AAP nung inyakerter kar amakba tatalokba metetdaksü.

Honibarnü Delhi kübok Rohini area nunga election nüboyim sentong ka nung AAP MLA Mohinder Goyal amak, ta Kejriwal-i metetdaksü.

Rithala assembly menden nungi AAP candidate, Goyal-i

Sector 11 kübok Pocket H nung alirtem den sensaksemba mapang nung kari pa amak, ta pai ashi.

Honibarnü Rajya Sabha MP, Sanjay Singh-ia shidi ka ajanga Election Commission dang, BJP nung inyakerter AAP nung inyakerter amak aser New Delhi constituency nung nüboyimba nokdanga liasü, ta metetdaksü.

New Delhi constituency nung Kejriwal-i BJP nungi Parvesh Verma aser Congress nungi Sandeep Dikshit na den tokteptsü.

Karnataka nung teimla makai shirangertem asütsü temeden agütsütsü

Bengaluru, February 02 (Agencies): Karnataka nungbo shirang aneptsü teimla makai mapang talangka shirangertem süadoktsü atema temeden agütsütsü; India nung iba temeden agütsüba mezüngbuba state ji Karnataka asütsü.

Mapang talangka timtema shirangertem nem asütsü temeden agütsütsü asoshi Karnataka state sorkari state tesem ajaklen hospital tem nung medical boards tentetang, ta tuyuogo.

2023 küm Supreme Court-i, India temzüng nung Arlla 21 kübok 'Right to Life' nung 'akümketa asütsü temeden'-a züngoktsüla, ta metetdakja liasü.

January 31, 2025 nü

Karnataka state health minister, Dinesh Gundu Rao-i sangdong ka ajanga iba telemtetba agiba metetdakja liasü.

"Iba ya puti otsü asütsüsa tetuyuba ka lir, aser Supreme Court obendang den puteper," ta health minister-i metetdakja liasü.

"Iba telemtetba agiba ajanga taneptsü angutsü teimla makai shirangertem mesüra taküm lemfar alirtem mesüra taküm soitba treatment ajanga tajangzük mangur shirangertem tajangzük angutsü," ta minister-i metetdaksü.

Iba tetuyuba ajanga ozüng kübok aser medical inyakyim nung ajemdaker mapang talangka timtema shirangertemi anisüngzük angutsü.

Anogo 25 tsüngda Delhi nung MCC alema inyakba 6,000 liasü: CEO

New Delhi, February 02 (Agencies): Bodhbarnü Delhi Assembly elections agitsü lia Amongnü Delhi Chief Electoral Officer (CEO), R Alice Vaz-i, tesüba anogo 25 tsüngda Model Code of Conduct (MCC) alema inyakba tashishiba 6,000 dak tali liasü, ta metetdaksü.

Vaz-i, election nüboyim sentong agitsü atema tetsükdaksü kecha magütsü online system ka ajanga temelaba agütsür, ta metetdaksü.

Laisa, cVIGIL app ajanga sensotemi MCC alema inyakba osangtem den noksa mesüra video lemsatepteter, ta

metetdaksü.

Item ama tashishiba ken otemji minute 100 tsüngda metetdaksütsü atema Election Commission-i tuyua lir.

Osangbener den jembidang lai, "MCC benokba mapang nung onoki CEO aser DEO level nung yimtenren party ajak den senden mena liasü. Election nüboyim sentongtem agitsü atema online ajanga temelaba meshitsüla," ta ashir.

Vaz-isa, voter tem shilem agitetdaksütsü atema maparen aika inyakogo; item rongnung nisung 7,552 nem kidang nungi dang vote agütsüdaktsüba densema lir, ta ashir.

Sanjay Raut-i Shiv Sena (UBT) toktsür Congress nung adentsü: Nitesh Rane



New Delhi, February 02 (Agencies): Amongnü Maharashtra nung minister aser BJP MLA, Nitesh Rane-i, Shiv Sena (UBT) nung lenir Sanjay Raut-i party toktsür Congress nung adentsü atema Delhi nung Congress lenir ka den jembidar, ta metetdaksü.

Rane-i, Rajya Sabha nung Sanjay Raut kümsük tatem banglen kati arudar aser pa nem maneni takok ngudaksütsüsa Uddhav Thackeray-i aniba party nung MLA peria mali, ta ashir. Yaküm November ita nung


agiba Maharashtra assembly election nung Shiv Sena (UBT)-i menden 20 nung dang takok nguteta liasü.

Maharashtra assembly nung menden 288 lir.

Mumbai nung osangbenertem den jembidang Rane-i, "Raut-i Saamana (Uddhav Thackeray-i aniba party osangkaket) nung pa Shiv Sena (UBT) nung mapang kobika alitsüar zülutsüla. Congress nung adentsü atema pai Delhi nung lenir ka den jembiba indang zülutsüla. Iba onük nung pai sangdong ka agütsütsüla," ta metetdaksü.

Amongnü Raut-i, Maharashtra nung Chief Minister Devendra Fadnavis aser deputy chief minitser Eknath Shinde na tsüngda mangatettep aliba ajanga yimsüsüba nung kongshir aser state merenloker, ta aija liasü.

Tang Maharashtra nung Shiv Sena (UBT) aser Congress na loktepa lir.



February 02, 2025 anepdang Srinagar nung aliba Holy Family Catholic Tenla ki anünglen nungi tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, FEBRUARY (TSÜKLAI) 03, 2025

Yimjung len apirtem

Assam aser Nagaland na tsüngda, talisa, arrtsülen alirtem putepa alitsü asoshi Border Peace Coordination Committee (Assam-Nagaland) purtemi Assam nung azünger Assamese nunger kaketshirtem aser Nagaland nung azünger Naga nunger kaketshirtem na külemi Govt High School Tzurangkong nung anogo asem tashi mongdakja saisapong aser sobaliba sentong balala ayongzüka aliba sentongji yimjung asoshi len apiba mapa tajung tuluka asütsü. Aiben asenoki yimjung yanglutsüba ya raratepa alidang tiyongi ia bendangtsüba mapaji dang yimjung yanglutsür amai bilemer, ajsüaka ajibo yimjung yanglutsür masü raratepa aliba bendangtsür dang lir. Aji oda, yimjung mapa yabo nisungtem rongnung rara metenzükdang meraratepi putepa lidaktsütsü asoshi sobaliba awashi, temeim aser temba yimtepa akangjungshitepba mapatem nungi tenzüker. Iba jagi Laishiba nunga yimjung bushiang ta kija masü saka aji arishiang ta shia aliba angutsü. Tetezü, yimjung nisungtem bushia marur saka nisungtemiang yimjungji bushitsüla aser jena oaka aji arishia oa puitsüla. Tanü Tzurangkong aser Mariani tsütsü alir Assam- Nagaland Border Peace Coordination Committee purtemi taintem rongnung masü saka school tanurtem rongnung yimjung mapa tenzüksüba yimjung arishia aoba mapa ka asütsü. Alima nung ya kinunger aser medemertembo tesem balala nung pei ali lia aotsüa akok aser kodanga külemibo melitetsüa akok, ajsüaka kidanger o kidanger na aser kiyonger o kiyonger nabo teti külemi alitsü. Aji oda, Assam aser Nagaland nata alima mesama tashi kidanger aser kiyonger asütsü, anungji alima süaka, nisung süaka teti kidanger aser kiyongersa alitsüba purtem asoshi yimjung bushitsü aser teti yimjung nung külemi alitsü merangtsüba anogo shia aser küm shia teinyaktsü mapa tongtibang ka lir. Aiben kija kibong tsüngda süaka, kin o kin na tsüngda süaka kidanger o kidanger na aser kiyongertem rongnung süaka mangatettep, meputep aser mepelatep adokba ya ali raktepa tsütsü ataloker, anungji akok tashi ali nung morumoru mesüi Tsüngremi asen nema tang tashi kechi tashi moaja lir, iba jagi tenük sünger, ali dang nungibo kidanger aser kiyongertem den putepa alibasa taoba aser tajungba ta angateta teti yimjung bushir taküm aser telok asütsüba yimjung kidang-kiyonger ajak asoshi teinyaktsü tongtibang mapa asütsüla. Aji oda, asenok alidaka kidang-kiyonger ki semtepa aser kiyonger timtem aser tepela meteta alitsü merangba ama, Assam aser Nagaland na tsüngdaa tang Border Peace Coordination Committee purtemi inyakba amaji, mapang mapang shia arrtsülen yim o yim na aser telok o telok na ajurutepa akhi sobaliba aser tesendaktep tajung indang otsü ashiba aser tarutsü nung Naga nunger o Assamese nunger na putepa alitsü shisalemsatepba sentongtem ayongzüka agira, iba jagi teti asoshi state ana tsüngda yimjung apu yanglur asütsü. Alima nung ya kija süli, state süli kati ka dak metaloktepa alir, anungji tapu aika bilemaka Naga nungertem Assam nunger teyari magi melitetsü aser Assam lima majangi kechaia moutetsü. Kasaji, Assam nungertema Naga nungertem den majuruteptetsüa mejungtepra parnok asoshi parnoki züsentetba aser yanglutetbatem ayokdak 'bazar' tuluka samar amai asütsü, anungji parnoki züsentetba tayokdak maka Assam nunger aika akoksatsü. Aji oda, Nagaland nung kecha meyanglutet aser mezüsentetba timtem aser takoksaji Assam nunger aluyimer aser shishilembar asoshibo temoatsü lir. Ibaji kodang angatetdir asenoka kati ka akümtsüputepa alitsü aser state o state na ta kati ka nungdakji angateta putepa alitsü merangtsü. Tanü Mariani aser Tzurangkong tsütsü Assam aser Nagaland na putepa alitsü asoshi kaketshirtem ajururtepdakja tangatetba agütsüba yimjung Border Peace Coordination Committee purtemi yimjung metsü tajung ka prokogo, ibaji asung asotsü aser state ana tsüngda yimjung alitsü. Kasaji, Amguri-Tuli-len aser Wokha-Golaghat lena yimjung len apitsü nungdak reprangteter.

OLEMSABANG

OCHIMASHI ANEMA AROGO NOK-O-NU

~ Wati Longchar (Eralibill)

Arogo kimong

Arogo ya Tsüngremi yanger. Ochi ajanga alima dangi tesangwa bener aotsü Yisu Khrista züii alangzüka purtem lir. Arogo ya alima lokti tentet ka amai masü. Ya amangbapur kotak lemangi anitsüba kikümbang. Iba temeshi arogo nung tenzükertem meshiteta aser ochi nung noktakba ajanga alimai akhum tsübur. Tejen aser Tasen Lai anaprongla nung arogo ya alima dang ochi kuli asütsü, ochi ajanga alima nung temelenshi adokdaksütsü nungloktsü ta kuli asür. Tejen Lai nung ainkartemi ochi mashi yimsüsür aitsü, artsü aser Tsüngremer obendang indang shin. Yisu Khrista ochi nung noktakba ajanga yimsüsürtemi kangki nung meta. Ochimashiji ochi agi dang kokteter. Kodang ochi kuli mesuteter arogo kulisuba mali. YSS sabang leniri yamai zülu, "Tsüngrem tenzüker kati meimtsüla, taochi sayutsüla, sarasademtsütsüla, yaritsüla, aria bilemetsütsüla, saka item Khristan temeim aser aria bilemba sayu o jagi `ochi`ji nemembangtsütsüla. Ochi kuli mesutetra arogo kimong maka." Anungji iba ochimashi lima nung arogo nok-o-nu-ji "ochi" ya lir ta angtetdi.

ASTD-i DABA dangi shity

Yimden aser arogo tesendaktep aser tepila indang jembidang sabangpur aikati ASTD-i inyakba ya yimden mapa tim inyakogo. ASTD-i arogo dangi shity züluba nungji arogo inyakim mesüra teküemyim ka indang shia mali. Yimden ka ama aibelener nem tapet temerenshi agütsütsü indang dang shia lir aser aji tim. Iba shity nungji Baptist distinctive - separation of church and state mangatetep kecha madoker. Ano külen iba ken-o temer aibelener merenshitsü ta ashibaji shitak dang ta shisem. Sabangpur kati "ASTD-i züluba jung junga digest mesui sabangpur aikati züluogo Yimdeni arogo nung kecha teka amokba mangur, saka aibelenba potetra/meshitak inyakba potetra alima temzüngi melaba ama merenshitsü tim." "Shity nung No. 3jibo tim dang aser par mapa shitak inyaker" ta nenshia sabangpur kari shisem. "ASTD-i paise ka danga tatem tashi bushitsü ta ashibaji kanga shitak ka lemtetogo" kechiaser Mungdang nungi tenzüker arogo nung ochi mashii sen amshiba metpur dang tai doker yutsüba ajanga arogoibo tai adoktsü ta tangatetba nung kecha metsüba arogo aika nung sen amshirtemi temenoktsü aliba tai doker (adjust sur) yutsüba ajanga Covid wara ama arogotem aika nung ataloka aruba osangtem asenok ajaki angashia arur. Iba ama ochi nembanga yutsüba maparen ya anentsüla. Yamaji ASTD-i tim shity züluogo ta sabangpur aikati shisem.

Arogo yimden aser arogo nung tenzüker

Yimden aser arogo naprongla Tsüngremi tenzüker anungji temeshi menden. Ya railway track amai lir. Anaji balala saka anapronglaji ali nung dang train oteter. Külemi yaritepa alima yangertsü, yimjung bener arutsütsü, aser alima ochiba inyakba ajanga terenlok bener arutsütsü teyanglur Tsüngremi iba yimden ana moatsü. Anaprongla nukjidong ka, saka inyakim balala. Kati ka madak tashi amshitsü merangra iba jagi lendong bener arutsü. Alima aika nung lendong aser rara mapang, alima yimdeni meinyaktetba mapang tamangba yimsü lenirtemi yimjung bener arutsüba otsü aika lir. Naga lima nunga azü tokshiba mapang arogoi yimjung mapa inyakba ajanga temelenshi bener arutsüba otsü azünger. Koba lima nung tamangba tashi maiti kümdir yangji azü tokshi jendi ajurur ta metetdi. Ano tamangba yimsü ya meimchir lokti aser kija taküm asoshi kanga tongtibang asü nung alima yimden tashi arakmoka ayutsü atema alima yimden lenirtemi tamangba yimsü telok balala nung makmakshimak adokdaksütsü meranger. Taoba Nagaland state election aser Lok Sabha mapang politician-temi tamangba yimsü koda amshi ajaki meteta lir. India nung anogo shia tamanger rishikangshiba ya tamanger telok rongnung lemsadaksütsü nukjidong nung ta metetdi. Anungji yimden anaji balala aser kati ka akhumtsüba yimden tim.

Arogo nung tenzükerji "arogoyimden" denji maiteptsüla; arogo nung pastorji arogo yimden masü, saka arogo kilir ka dang. Meimchir dang asü nung inyakdang meteta aser memeteti aibelena inyaker atar. Yongji arogo temeshi menden wazüka ayutsü ozüng yanglu lir aser aibeleneritemji arogo ozüngi melaba ama merenshitsüba yimden tim. Arogo otsü nung tiyazü tesayur, nuktapangtar, rongsen ketdangsuba nung aibelener tamanger telok nungi jendokba otsü nung azünger. Ibai kechiba inyaker ta sura arogoji ochi aser temeshi ta sayutsü asoshi lir ta angatetdi.

Ano aibeleneritemji alima yimden ozüngi melaba ama jail-i yokba mesura ozüngi melaba ama merenshia aru. DABA nung atalokba public domain nung ali nungji, tatishitsü amai arogo tenungji tetshidi. Koba DABA nung crore 3 tema tim mesui amshiba nuburtemi jembir ya shitak asü masü kuli bushitsüla aser arogo inyakim nung kechisa temelenshi nungdak rakpoka jembitsüla. Senji shitak mesui amshia lir ya "Misuse of public money and it is crime as per the law". Tamanger agütsüba ter shilem aser temeranger tenla, aji Tsüngrem meyong aser Tsüngremer mapa inyaktsü tenzüker nem nungloktsü. Anungji aibelena lira arogo nung tenzüker alima ozüngi alentsüla. Ya shitak/tai temeten kuli mebushitet tashi tenzüker mapa nung anena atatsüla aser tenzükertemia FIR file suang ta akangtsü nungdak ta lemsatepdang, sabangpur aikati ya tim ta shisem. Aikati "shitak shiogo", kari "mezüngyongi ya inyak nung jungla ta bilema liasü", "Tesungmangtsüaja, Arogopuri Tsüngremer wadang asoshi sen tenlaba chiadokba ya. We need to analyze as community why are we so beholden to money". Aor lenir teintet kati, "Dr. Wati tang kechi züluogo ajak dang temaba ochi o lir aser Arogoi yamai inyaktsü sentong atongtsüla." Yamaji tejashiba aser tesasaba o aika lemsatep. Nuburtemi arogo sen tim mesui amshibaji kechiba khokoa bilemer ta sura arogo sen ya sarasadema amangba puri Tsüngrem mapa ashi agütsüba. Anungji amangba puri temulung melemtetti tenzüker pulpit nung koda nokdaksü. Alima nung timtem (crisis) ajanga temelenshi bener arutsüba otsü aika lir. Kar asoshi ya tako marok asütsü saka tarutsü asoshi Arogo yanglushiba mapang tajung ka Tsüngremi bener arutsüogo. Aibeleneritem ajemalua Tsüngrem dangi meyipdir ano tanaben Tsüngremi moatsütsü. Anungji ibai timtem ajanga arogo yimden aser inyakim nung kümümshitsü mapang tajung ta agizükd.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Melungtet telok kati American missionary tem Haiti nungi anitet



America nunger missionary Zachary aser pa kinüngtsü Mica Ennis na den kinü tanur, Niah tayimtsü nungi anir aodang tangokba noksa nung angur.

February 02, 2025: U.S nung melungtet telok kati rara aliba Haiti nungi America nunger missionary kibong ka kumzuka anitet.

Taoba hopta US sepai nungi anisungzucker alir melungtet telok kati Haiti nungi America nunger missionary kibong ka anitet.

Haiti yimtiba, Port-au-Prince nungi mile 50 shi pilar Saint-March nung aliba mission centre nungi missionary Zachary aser pa kinüngtsü Mica Ennis na den la jala kinü tanur, Niah nung kumzuka iba tesem nungjagi anitet.

Melungtet telok 'Project DYNAMO' ya international rescue tekok ka lir. Hombarnü (January 27) parnoki tayimtsü ajanga missionary kibongji

kumzuka anitet.

Ennis'er kibong jagi timtem ajurutsusa liasü. Anogo ishika jakdang ang prangpong amer telok kati Ennis'er mission kima tebur ka tekolak tangzuka lepseta liasü, ta Mongolbarnü Project DYNAMO-i sangdong ka ajanga metetdaksü.

Hombarnep helicopter ka Miami nungi apusoba sülen Sant-Marc nungi missionary kibongji kumzuka Cap-Haitien nung aliba asetkong kati anir ao. Iba sülen Hombar aonungjisa missionary kibongji tayimtsü ka nung Dominican Republic-i anir ao aser Santo Domingo nung aliba American Embassy nung treatment agi.

American aser Dominican sorkar napronglai iba mission nungi yaritepa liasü.

Project DYNAMO nung CEO, Mario Duarte-i talisa Dominican Republic National Intelligence Director, Maj. Gen. Manuel Claude Pimentel Pérez aser U.S. Senator Ted Cruz na dang pelaba lemsatepogo.

US-i kumzükba mission meinyakba tesemtem nung Project DYNAMO-i America nung kumzükba. Iba telok ya 2021 kum tenteta liasü.

Zachary tetsü, Dianne-i Project DYNAMO telok dang lar jabaso kibong kumzüksü mepishiba sülen iba mission tenzuka liasü.

Iba mission piyong kinüngertem aser medemertemi sarasadem ajanga nungita liasü aser Tsüngremi parnok kumzükogogo, ta Dianne-i metetdaksü.

Refugee Program agienba ajanga Khristantem timtemtsü: World Relief

February 02, 2025: US Tir, Donald Trump-i United States Refugee Admission Program (USRAP) agientsü telemtetba agiba ajanga reshikangshi linüktem nungi ajenba Khristantem timtemtsü, ta melungtet telok World Relief-i metetdaksü.

1979 kum nungi World Relief-i U.S. State Department den longjemer inyaker.

World Relief-i Trump dang, iba telemtetba repringshitsüla aser USRAP tanaben benoktsüla, ta mepishia metetdaksü.

World War II mapang nungi tenzuka iba Program kubok US-i reshikangshi ajanga linük balala nungi ajenba refugee tem jenokdaksür.

January 20 nü Trump-i Tir tenangzükba agiba sülen office nung mezüng anogo nungsa pai iba program agiena liasü.

Executive order ka ajanga, "United States-i bendangertem, talisa refugees aika magizuktetsü," ta metetdakja liasü.

Executive order agütsüba sülen World Relief-i sangdong ka ajanga Trump dang iba telemtetba meyipa

repringshitsü mepishi.

World Relief nung Tir aser CEO, Myal Greene-i, "Iba telemtetba agiba agi onok jashir. Alima nung tang ang refugees teimba aliba mapang ka nung United States-i refugees taliba yaritsü nungdak, ajisüaka iba telemtetba agiba ajanga onok mepelar," ta metetdaksü.

January ita tetenzüklen World Relief-i "Refugees jenokdaksütsü atema Khristan sangdong" ta ser shidi ka Trump nem agüja liasü. Trump nem agütsüba shidi nungji National Association of Evangelicals nung lenirtem, Ethics & Religious Liberty Commission of Southern Baptist Convention nung lenirtem, Christian advocacy organizations nungi lenirtem aser alima tesem balala nung reshikangshi ajangshiba Khristantem temeden atema inyakertemi sign süa liasü.

Donald Trump mezüng US Tir inyakba mapang nung linük nung refugees 50,000 tashi jenokdaksütsü atema temelaba agüja liasü. Tawa Khristan lenirtemi pa nem agütsüba shidi nungji pa dang maneni linük nung refugee 50,000 tashibo

agizüksü mesüra iba dang nungjagi teimba agizüksü mepishia liasü.

"Reshikangshi ajangshiba Khristantem dang masü saka tanga yimsü amangertema kumzüksü atema Tir Trump lenisüba nung linüki inyaktsü akok. Iba atemaji U.S. refugee resettlement program tashitaitba akümtsü nungdak," ta National Association of Evangelicals nung Tir, Walter Kim-ia metetdakja liasü.

Khristan melungtet telok Open Doors U.S-i ashiba agi, 2024 kum linük 50 nung reshikangshi ajangshiba Khristan 29,493 bo US nung jenoka liasü.

Open Doors U.S nung Tir aser CEO, Ryan Brown-i, "Alima tesem ajaklen Khristantem tetsübu nung aliba mapang ka nung asenoki maneni asen aianu aser adianutem yaritsüji kanga tongtibang asütsü," ta metetdaksü.

Lifeway Research study ka ajanga bushitetba agi, US nung tamanger shilem 71-ibo bendanger refugees agizüksüji US atema teinyaktsü mapa ka lir ta bilemer.

ANOGO ABEN TSÜNGREM DEN

Mulung Lemtet aser Telungjem

Tsüngrem,shiba ajanga nenok pa chir asen Kibuba Yisu khrista den lungjemdaksütsü aja, pa temulung lemtetba lir. 1Kor. 1: 9

"Na mulung lemtet tulu"iba Lai tekong o ya lepshia amshiba lir.Laishiba nukjidong kaji Tsüngrem mulung lemtet sayutsüba lir.Laishibaren otsüji,taküm lia ajak nung ajaki pa dak temulung adokba sayutsüba lir.Iba tekong nung temeja mulunglemtet onükji "Par Chir den lungjemba".O tulu ana külemi amshir:Temulung lemtetba aser telungjem.Tamangtsü,tsüngchiba aser ochi mulung lemtetji inyaker.Saka Tsüngrem mulunglemtetji asenok teyongyaba agi asadangtsü makok.Tsüngremi kechi mulunger aji pai teti inyaker ta asenoki agizüksü akok.Asenok kodanga meshirangtsü asoshi sarasademtsü akok aser kodang asenok shirangdir Tsüngrem mulunglemtet masü kechiaser shirangji pai nokdangtsü akok ta asenoki bilemetsü akok.

Saka Tsüngrem mulung lemtet pa tenangzükbatem den sendaka lir.Item ajak Pa o nung peria shia lir.Asenoki aji melamelaa mashilen azüngtsü mesüra angatetsü akok,saka itemji Tsüngrem temoatsütem arudak ayongpang lir.Tsüngrem mulung lemtet tetezü, pai asenoki asüngdangba ajak inyaktsüla ta masü,kechiaser asenoki tai asüngdangra aser nukjidong tai yur, asenoki Tsüngrem mulung lemtet mapa tai obendang agütsütsü akok.

Tanabuba tongtipang o ji "Telungjem".Ibai Greek o nungi meyipzükba tebur tajung o ka lir.Ibai lemsatepba,agütsüba,aser agizükba lir.Par chir den lungjembaaji kibong nung ajak den Tsüngrem chiri talubusa lemsatepba lir.Yimya agi kibong nung tanur kati oset ka ibai kü meyong aser nai amshitsü makok ta ashitsü akok.Saka Khrista rongsen ajak tamangertem ajak den kasa lemsar.

Kodang telungjem nung kati ka den puteba melilir telungjem raksar.Mulunglemtet maliba ajanga satiba talentep,telungjem aser iba tepalaji raksar.Temeneni telungjemji raksatsür,saka asenok telungjem masür,pa taküm asenok nem agütsüba ajanga Tsüngrem temulungjem meraksai ayutsü Tsüngrem temulung lemtetba lir kechiaser pa jabaso tesendaktepi meraksar.Pa chir telungjem Khrista ajanga meraksar ta metetsü koda tepelatsü.Iba tetezü, ni telungjem raksatsüsa langka inyaka lira, ni aji nangzüksüla aser yanglushitsüla.Ibai Tsüngrem tai masü-Pa temulung lemtet lir.

Oba,meraksaba telungjem asoshi ne tenüng asanger.Mulung lemtet aser telungjem aginüba asoshi ne tenüng asanger.

WEA General Assembly Seoul nung akatsü

February 02, 2025: World Evangelical Alliance (WEA)-i pastor Younghoon Lee-i taruba General Assembly South Korea yimtiba, Seoul nung taküm October 27-31 anogotem nung ayongzuka akatsü, ta metetdaksü.

South Korea nung Khristan telok aikati, iba sentong ya mimshia renemba lir, kechiyong iba sentong renem dang South Korea nung aliba Khristan tentettem nungi züngsemtembo mejaok, ta ashir.

Seoul nung aliba SaRang Arogo nung tongti pastor, Rev. Junghyun "John" Oh leniba nung World Evangelical Alliance (WEA) General Assembly Korea nung WEA GA atema renemdar. Iba sentong ya alima nung Pentecostal Arogo tulutiba Yoido Full Gospel Church-ia nungita yaritsü.

SaRangArogoi "2025 WEA Seoul General Assembly Organizing Committee" nungtem nung Tsüngrem nem tenüngsang agütsüba sentong ka agiogo aser iba sentong

nungji Yoido Arogo nung tongti pastor Younghoon Lee-i Tsüngrem O jembia liasü.

Tawa pastor tem, deacon tem aser proffessors 1,000-i, "Reasons Why the Korean Presbyterian Church HapDong Cannot Engage with the WEA" ta ser ocet ka sangdonga liasü.

Parnoki WEA lenirtemi Pope aser World Council of Churches den tesendaktep tajung ayuba ashishiba den külemi Muslim lenirtem den-a tongtepratepba ashishi.

South Korea nung Christian Council of Korea (CCK) Tir, Rev. Seo-young Jeong-i, South Korea nung WEA GA ayongzuka akaba ajanga Korea nung aliba Arogotem tsüngda ano telemsa taliba adoktsü, ta metetdaksüogo.

WEA indang theological tangatetbatem mejangja tashibo Korea nung WEA GA ayongzuka akatsü alibaji thinentsüla, ta Arogotem aikati ashir.

AO OSHI ANGAZÜKDAK:

TANÜ ANGAZÜKTSÜBA OJANG



Tedong

(n) süngdong temang (stem)

* Moaba'er lu nung süngjang tedong aika meyteta lir.

Tedong

(n) aiür asangur tsüngda meimtepba medemer (girl friend/boy friend)

* Asangla tedong nisung tajung ka lir.

OLONG PAITEP # 7054

Grid for OLONG PAITEP # 7054 with numbers 1-16 in various cells.

TIPLÉN

- 1. Anenzükdak ki - (5)
3. Asür mangyimba - (5)
5. Temulung nungshisadang - (5)
8. T___lu - (3)
10. Takdang temalen - (9)
11. Tesa___a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. ___ur - (3)
4. Kiojen yangludak - (6)
6. ___ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. ___adenshi - (4)
14. Tsünüsenbongtsü adokdak - (3)

OLONG PAITEP # 7053 TELANGZÜBA

TIPLÉN :

- 1. Kasa, 6. Rangben,
7. Mait, 9. Poktet, 11. Ati,
13. Atasa, 16. Rür, 17. Rajang,
20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita,
10. Tar, 12. Tinu, 14. Salem,
15. Aja, 18. Anünü, 19. Taju, 21. Ano,
22. Onü, 23. Kua.

NAI-A YA METETTER MA



British band Coldplay ajanga music tour history nung otsü tassen ka yangluogo. Coldplay indang Music of the Spheres World Tour ano ita 8 anünga lir saka Taylor Swift indang The Eras Tour dang nungi nisung teimtibai Coldplay tour nung denogo aser iba ajanga highest attendance otsü yanglutet.

Coldplay-i Mumbai aser Ahmedabad nung Music of the Spheres World tour India leg shiolem agia liasü aser Ahmedabad, Gujarat nung aonung ana nung nisung 223,000 tashi aden.

Asom Sahitya Sabha nung cultural procession agi



Guwahati, February 2, 2025 (Agencies): Pathsala nung Asom Sahitya Sabha indang 77 buba Biennial Session tasemnübuba nung cultural procession tulu ka ayongzüka agiogo.

Iba sentong nung Asom Sahitya Sabha president Dr. Basanta Kumar Goswami aden aser pa peacock-feathered chariot ka nung mener senzü.

Iba sentong nung nisung lakh

5 tema aden aser Bajali yimdong ajunga nung benjungtepa liasü.

Iba sentong nung Reception Committee President Ranjit Kumar Das, Minister Kaushik Ray, MLA Phanidhar Talukdar, Amiy Kumar Bhuyan, aser literature nisung aika aden.

Padma Bhushan awardee Jatin Goswami-i iba cultural procession lapokja liasü.

"Nisung kari Asom Sahitya Sabha anemaka iba procession ajanga teimla aser tangatetba adokdakjang. Shisaliok aser sobaliba yimti Pathsala nungi iba ya adokdakjangma" ta Jatin Goswami-i ashi.

Pathsala nung aliba Anandaram Barua Academy nungi Assam Sahitya Sabha indang Bhattachdev Kshetra tashi kilometer 6 iba cultural procession agia liasü.

Centre-i Manipur nung ayong 2 atema Rs 86 crore lemozüksü

Imphal, February 2, 2025 (Agencies): India sorkari Imphal aser Kongba kümozüksü, wazüksü aser tobur jungdaksütsü atema Rs 86 crore lemozüksüogo.

Ayong ana dang ya rivers of sorrow tab ajar aser Imphal yimti tiyongsü nung ayimer.

Manipur Chief Minister N Biren Singh-i tawa tu New Delhi nung Central lennirtem den ajurutepa liasü aser Deobarnü State Secretariat nungi iba osang metetdaksü.

Imphal River aser Kongba River ya tzüngluruwa mapang rivers of sorrow ta ajar aser Rs. 86 crore (approx.) endoka mapatong inyaksü ta CM Biren-i ashi.

Centre sorkari mapatong mulunga agizükogo aser mapa tenzüksü. Waithoupat Lake nunga mapa tajung kar inyaksü ta paisa ashi.

State sorkari Yaral-pat water body yanglushitsü maparen inyaker aser Rs. 650 crores endoka iba mapatong inyaksü

ta CM Biren-isa ashi.

2024 küm Manipur nung asemben tashi tzümetsüng ajurua liasü aser lipoküm mejungi akümba den arem tsüngdokba ajanga tzü poktetdak samar ta paisa ashi.

Manipur nung groundwater amshitsü atema Minor Irrigation Department kübok tesem balala nung ground drilling pumps 500 tema enokogo ta Chief Minister-isa metetdaksü.

Imphal West nung Arambai Tenggol züngsem 3 apu



Imphal, February 2, 2025 (Agencies): Manipur nung sepaitemi February 1, 2025 nü Arambai Tenggol züngsem 3 tashi apu. Parnoki Imphal West district nung tashiyim agi sen meshiba atema apu.

Honibarnü parnoki Keithelmanbi nung Imphal-Jiribam National Highway nung senzüba khu abenba garitem

dang nungi sen meshia challan agütsüba atema apu.

Parnok ya Thangjam George Singh (28), Abujam Narendra Singh (21) aser Wahengbam Amarjit Singh (35) nunger ta jangjaogo.

Parnok ket nungi - Thermal Printer & Paper Roll, Wireless Sets, Aadhaar Card, notebooks, wallets, Rs 1,600 aser gari ka

puogo.

Sepaitemi NH-2 aser NH-37 nung khu abenba garitem timtem kecha melii senzüdaksüogo. Lendong ataloktsü akok ta bilemba lenmang nungbo security convoy agütsü.

Manipur kübok district balala nung Nakas/Checkpoints 111 tashi amenoka mapa inyaker ta sepaitemisa ashi.

Canada-i US anema tariffs 25% benoker, Mexico aser China-ia langzuitsü

Washington, Tsüklai/ February 02 (Agencies): Deobarnü Canada-i sen \$155 billion jenjang US imports nung tariffs shilem 25 meshitsü sangdongogo, aser Mexico Tir Claudia Sheinbaum-ia lar economy minister dang lai linük tejangdaba kumzuka ayutsü mechi tariff aser non-tariff mera agitsü totuyuba agütsüogo. US Tir Donald Trump-i Deobarnep Mexico, Canada aser China nungi osettsüset bener aruba nung tariffs tesashi meshitsü totuyuba agütsüba sülen iba mera ya agir. Trump-i meyongnem agütsüba totuyuba nung ano US

anema telangzüba agütsüra item tariff nung ano temloksü shia lir. Iba telemtetba ya ajanga alima rongsenketzung aser Trump indang political mandate nunga timtem ajurutsüsa akumer, ajisüaka Republican tiri social media nung iba telemtetba ya America nung kumzuka ayutsü asoshi nungdak lir ta ashi. "Tanü ni Mexico nungi aruba Imports nung Tariff shilem 25, Canada nungi aruba (Canadian Energy) nung shilem 10 aser China nungi aruba nung Tariff shilem 10 benokogo. (Maneni tapak 8 nung...)

Trump ajurui Israel PM Netanyahu ayamesogo

Jerusalem, Tsüklai/ February 02 (Agencies): Tir Donald Trump ajurutsü asoshi Israel Ato Kilonser Benjamin Netanyahu Deobarnü linük nungi ayamesogo, anungji taoba ita Republican lenir US tir akumba sülen bendang lima nungi leniri Washington DC semdangba pa mezüngbuba akumer. Taküm January 20 nü Trump tenanzükba agiba sentong nung India nung External Affairs Minister Dr S Jaishankar densema linük balala nungi lenirtem dena liasü, saka linük ana tsüngta yimten ken o jembitsü asoshi Trump den aruteptsü aor lenir ibai

mezüngbuba alitsü. Netanyahu ya Trump den White House nung ajuruteptsü jaoka liasü, kong tena Mongulbarnü ajuruteptsü, ta Israel PMO ajanga ashi aser lenir ana ya Gaza tensa, Hamas-i pua alirtem indang jembitsü. Ano Israel-i tawqa Iran aser Iran-i yariba telungpur den raraba indang ken oa jembitsü. US-i mabusodang Netanyahu-i January 20 inauguration sülen Trump ajurur alima lenir mezüngbubaji pa asütsü ta ashi aser ibaji ajanga "Israeli-American alliance" tashi aitba kuli sayur ta shisem. "Ibai küna tsüngta tesendaktep nung tashi aitba kuli lir," ta pai ashi. Tena ajurutepta mapang Hamas, Iran aser Middle East indang onüktem densema jembitsü, ta Israel ato kilonseri ashi. "Iba senden nung onok tongtipang ken o tem jembitsü, ajangshia aliba ken o tem, Hamas madak takok angutsü,

pua alir ajunga chioksü aser Israel, Middle East aser alima ajunga indang yimjung nung timtem agütsüba Iranian terror axis indang jembitsü," ta Netanyahu-i ashi. Tajungba atema Middle East indang "redrawn map" ano yanglushitsü asoshi Israel-i Trump den teka amteper inyaksü teimla lir, ta pai ashi. "Rara nung asenoki telemtetba tem agiba ajanga Middle East tejak melenshiogo. Asen telemtetba aser asen sepai tasü aitba ajanga map yanglushiogo. Saka Tir Trump den teka amteper inyakba ajanga ano tali tajungba yanglushitsü. Asenok tashi itshiba ajanga yimjung tendak tasen ka arutsü ta ni amanger," ta pai ashi. Ita 15 raraba khen atena atatsü asoshi Hamas den hopta trok ceasefire lia lenir ana ya ajuruteper. Ato Kilonser Narendra Modi-ia tan ita United States semdangtsü amai lir, ta Trump-i taoba mapang shia lir.

SANGDONGER

Chuchuyimpang yimtsüng kübok sector tasen ka "Yimsentzübu Sector" Riongsanger Putu Tatar Menden akhüm nung mesemetogo.

Iba sector ya District Executive Force Mokokchung den kidanger süa lir. Yimsentzübu Sector Chuchuyimpang ya; Chuchuyimpang Putu Menden tetuyuba nung inyakyim ajak inyaka aotsü tanü neburtem dang sangdonger.



Yimsentzübu Sector mesemetba anogo Chuchuyimpang, Riongsanger Putu Tatar Menden yimsüsür aser sector lenirtem tangokba noksa.

Sd/-
RONGSENSOWA
President
Yimsentzübu Sector
Chuchuyimpang Village

Sd/-
SUPONGLEMA
Secretary
Yimsentzübu Sector
Chuchuyimpang Village

Pakistan Army tekolakbai Balochistan semdang

Islamabad, Tsüklai/ February 02 (Agencies): Pakistan indang Chief of Army Staff Gen Sayed Asim Munir-i Honibarnü Balochistan province semdang, kong tesüiba ghonda 24 tsüngta sepai 18 aser kiralongrar 23 tepseta liasü. Army tekolakba den iba province nung tensa mejungi aliba indang osang tejangia lemsatep, kong security aser itdangiter tekolaktem dena liasü, ta Associated Press of Pakistan ajanga ashi. Army tekolakba den Balochistan Chief Minister Sarfraz Bugti aser Governor Sheikh Jaffar Khan Mandokhail nungeri sepaitem asüpila nung sarasademtsü aser Combined Military Hospital Quetta nung yirur tema anepalua aliba sepaitem semdanga liasü, ta Pakistan mitkar indang media wing Inter-Service Public Relations (ISPR) ajanga ashi. "Tembar ama sernung tsükchir tem yagi kechisa inyakdir inyakaka, asen linük aser armed forces temi nenok madak takok angutsüsa," ta Gen Munir-i ashi. Kiralongrar anema tasü ita temulungtetba tulu nung raraba asoshi pai army tanishir aser sepaite, Frontier Corps aser ozüng amshirtem nem tenüngsang agüja liasü. Army temi Balochistan nung nüburtem timtem majurui yutsütsü aser security agütsütsü temulungtetba nung lir ta pai ashi. Pakistan southwest tsütsü Balochistan province nung khatepdang security personnel 18 aser kiralongrar 23 takum sama.

Mitkar temi ashiba agi, kiralongrar tem ya tesüiba ghonda 24 tsüngta Balochistan tesem balala nung tepsetba lir. Honibarnü Harnai district nung iba ama operation ka agidang linük sepaitemi kiralongrar den khatepa telungpur 11 tepset aser kiralongrar atsükshiba tesem kar raksaa indoktsü. Hokulbar aonung Kalat kübok Mangocher area nung telungpur temi lenmang mokdangtsü merangba security forces temi takok ngua aridok aser kiralongrar 12 tepseta liasü. "Tang tashinung Balochistan tesem balala nung tesüiba ghonda 24 tsüngta kiralongrar 23 molumi-i yokogo aser tasü mait mapa tamajung inyaker nem obendang magütsü tashi maneni operation agitsü," ta army ajanga ashi. Ajisüaka shingia amakba atema tenüng agia mali. Balochistan nung Baloch extremists temi azüdokshiba tali angur, kong item telok yagi security forces aser danga province nungi arua aliba nisungtem dak mapang shia amaker. Balochistan ya Pakistan nung province tulutiba lir aser danga province dang nungi ali rongsen yangji timba liaka terenlok tsütsü kanga ajemer lir. Nokdanga aliba Tehreek-e-Taliban Pakistan telungpur telok sorkar den ceasefire agreement agia aliba raksaba sülen kiralongrar temi azüdokshi tali kumogo. 2024 küm iba province nung kiralongrar temi 444 ben amakdang security züngsem 685 takum samaogo.

Sl. No.	(1) Name of Borrower(s)/ Guarantor(s) and Branch	(2) Particulars of property/assets charged	(3) Date of Demand Notice and Outstanding Amount
1.	1. Mr. Nitoka Sumi, S/o Mr. Vikheto Zhimomi (Borrower) 2. Mrs. Acme Choppy, W/o Mr. Nitoka Sumi (Co-Borrower) Both residing at: H/No 118, Samaguri Village, Purana Bazar, Toluvi Auto Stand, Dimapur, Nagaland - 797112 Branch: Dimapur	All the piece & parcel of portion of land measuring 0B-2K-16L and construction thereon situated at Patta No - 640, Dag No - 466/719, located at Dubagaon AK, Mouza No. 3, Block No. 12, Toluvi Village, Near Samaguri Auto Parking, Dimapur, Nagaland - 797112 registered in the name of Mr. Nitoka Sumi S/o Mr. Vikheto Zhimomi. Bounded as under : On or towards the North : N C Lotha, On or towards the East : Approach Road, On or towards the West : Isu Phom, On or towards the South: Pulobe Sumi.	Date of Demand Notice : 18/10/2024 Outstanding Amount: Rs. 36,68,067.00 (Rupees Thirty Six Lakhs Sixty Eight Thousand Sixty Seven Only) plus future interest as per applicable rate and other charges thereon w.e.f. 18/10/2024.
2.	1. Mrs. Kihikali Awomi, W/o Mr. Ikhadu Aye (Borrower) 2. Mr. Ikhadu Aye, S/o LT. L. Zhehito Aye (Co-Borrower) Both residing at: H/No. 31(A), Opp. To Burma Camp, Power House Colony, Dimapur, Nagaland - 797112. Branch: Dimapur	All the piece & parcel of portion of land measuring 508.36 Sq. Mtr. (5472 Sq. ft.) and G+2 storied residential building to be constructed upon the said land owned by Mr. Ikhadu Aye & Mrs. Kihikali Awomi situated at PATTAN-607, DAG NO-793, Block No. 3, Mouza No. 1 located at H/No. 31(A) Near Nagaland Rural Burma Camp, Dimapur, Nagaland and bounded as under : On or towards the North : Land of Hokto Zhimo & Er. Hukato, On or towards the East : Land of Imti Ao, On or towards the West : Main Road, On or towards the South : Land of Angami.	Date of Demand Notice : 12/08/2024 Outstanding Amount: Rs. 57,24,593.00 (Rupees Fifty Seven Lakh Twenty Four Thousand Five Hundred Ninety Three Only) plus future interest as per applicable rate and other charges thereon w.e.f. 12/08/2024.
3.	1. M/s AAL Enterprises (Proprietor : Mr. Yarmong) (Borrower Loan A/c No. 603XXXXX420, 603XXXXX325 & 604XXXXX223) Address : Shop No. SC-21, NAGA Shopping Arcade, Super Market Complex, Dimapur, Nagaland - 797112. 2. Mr. Supongnangsang AO (Guarantor of Loan A/c No. 603XXXXX420, 603XXXXX325 & 604XXXXX223) 3. Mrs. Bangersenla Longkumer (Guarantor of Loan A/c No. 603XXXXX420 & 603XXXXX325) Both 2 & 3 residing at : H No. 73, Near DPS B Block, Darogapathar, Two & Half Mile, Dimapur, Nagaland - 797115. Branch : Dimapur	All the piece & Parcel of land admeasuring 1652.17 sq. ft. and construction thereon situated at Patta No. 180 Dag No. 285 under Mouza No. 3 located at H No. 73, Darogapathar, Village 2 1/2 Mile Dimapur, Nagaland - 797115 in the name of Mr. Supongnangsang AO (Father of Yarmong). Bounded as follows : On or towards the North : Land of Gurung, On or towards the East : Land of Punala and Nelson Sangma, On or towards the West : Colony of Approach Road, On or towards the South : Land of Jenangsanger Society.	Date of Demand Notice : 09/09/2024 Outstanding Amount: Rs. 1,06,50,960.00 (Rupees One Crore Six Lakh Fifty Thousand Nine Hundred Sixty Only) plus future interest as per applicable rate and other charges thereon w.e.f. 09/09/2024.

Nagaland nungi cricket asayar anati M.A. Chidambaram Trophy angu



Nagaland nungi cricket asayar Hem Chetri aser Neizekho Rupreo nati M.A. Chidambaram Trophy agizükba sülen tangokba noksa.

Dimapur, Tsüklai/February 02 (TYO): Nagaland nungi cricket asayar Hem Chetri aser Neizekho Rupreo nati Col C.K. Nayudu Trophy (U-23) Plate Group nung dangar dang

Chidambaram Trophy anguba atema tenüngsang agütsür aser tejak tenteter, ta Nagaland Cricket Association (NCA) sangdong ka nung ashi.

Hem Chetri ya iba alakteta asayatetba yong M.A.

asayamung nung run timtiba

nguteter liasü, shibai average 43.4 nung runs 521 angu aser yangji century ana aser half-century ana lir.

Pai tensa balala nung kanga junga asayatetba yong iba takok ya ngua liasü.

Neizekho Rupreo nem iba sempet ya bowling tsütsü nungi agütsü, shibai asaya tenet nungi wicket 47 agia wicket timtiba agiteter liasü, aser yangji wicket pongu agitetba asaya trok liasü.

Pai asaya nung takok angutsüsa bowling sütetba yong aser sempet tajung ajiteta iba sempet agütsü.

Hem Chetri aser Neizekho Rupreo nati iba takok ngutetba ya Nagaland cricket asoshi alizüng tasen aser tongtipang ka lir aser domestic cricket nung state nungi lanurtem dak sempet tajung aliba sayur.

Parnoki junga asayatetba ajanga Nagaland aser tesem balala nungi lanur cricket asayartem tali ajungmesor. Nagaland Cricket Association ajanga asayar anaprong nem tenüngsang agütsür, ta NCA sangdong ajangasa ashi.

India-i ICC Women's U19 T20 World Cup tanaben kokogo

Kuala Lumpur, Tsüklai/February 02 (Agencies): Deobarnü Kuala Lumpur nung 2025 ICC Women's U19 T20 World Cup nung India U-19 Women's team-i South Africa madak wicket 9 agi takok anguba ya parnok asoshi WC title tanabuba alitsü.

Iba takok ya ajanga India ya Women's U19 World Cup takok marok dangar nem merakzükdaksüi yutetba team mezüngbuba akum.

Bowling tsütsü Gongadi Trisha-i runs 15 agütsür wicket asem agiba aser batting nunga laisa runs 44 (not out) agitetba ajanga India-i ayong-ayonga iba takok marok ngutet.

South Africa-i toss akok aser mezüng batting shim, aser iba telemtetba ya parnok asoshi takoksa tulu liasü, koba par mulungjang nung teti alitsü.

South Africa tsür tem ya India nung spinner temi kanga mangmangdakja liasü.

Asayar aseme (Jemma Botha, Karaba Meso, Fay Cowling) dang runs 10 mesüra tali yanglutet aser Mieke Van Voorst-i ball 18 nungi runs 23

nguteta liasü.

Mezüng innings atemdang India nung spinner temi asaya amokbanger asayaba jangjar liasü, kechiaser parnoki South Africa nung ya runs 82 dang yangluteter ajunga out sütsü.

India tsürtem rongnungi Gongadi Trisha-i tajungba onteta runs 15 agütsür wicket asem agi. Iba den ano Vaishnavi Sharma, Aayushi Shukla aser Parunika Sisodia nungeria wicket ana-na agi aser Shabnam Shakil-i wicket ka agia liasü.

South Africa tsüri yanglua yutsüba target yabo mela-mela tongteta otsü yanglua World Cup takok marok tanaben atonga angutsü teimla nung India tsür asaya tenzük.

South Africa-i kanga kera G Kamalini ya runs 8 dang yanglur lia out sütsü, saka ajiaki India tsür temulung mesenseni asaya.

Iba sülen Gongadi Trisha (ball 33 nung runs 44*) aser Sanika Chalke (ball 22 nung runs 26*) nati ayong ayonga nungdakba runs nguteta wicket ti agi South Africa madak takok ngua Women's U19 World Cup takok marok tanaben bener ao.

BENDANGLI OSANG :

Tapak 7 nungi...

Canada-i US anema tariffs 25% benoker...

Ibai International Emergency Economic Powers Act (IEEPA) ajanga inyak, kechiaser fentanyl densema asen nübur tepsetba "illegal aliens" aser temesepba mozü tebilemtsü lir," ta Trump-i pa indang Truth Social account nung zülü.

"Asenoki America nung kumzuka ayutsüla, aser Tir ka ama ajak kumzuka ayutsü kü mapa lir. Asen arütsü alema "illegal aliens" aser temesepba mozü tzümet süng ama aitba anendaktsütsü asoshi ni kü nübuyim mapang nangzük aser America nungeri aji bhukuma vote agütsü," ta pai ashi.

Item tariffs yagi America indang trading partners tulutiba ana, Mexico aser Canada den rongsenketzüng tsütsü mangatetep adoktsüsa akumer aser linük ana nungi meyiper telangzüba tesashi agüja shishilempaba tsütsü küm aika tesendaktep aliba raksatsü.

Item tariffs yagi osettsüset nung jenjang timba akumtsü, anungji Trump-i aonsotsü, totzü, kisü-jensü, gari aser danga oset nung jenjang ajemtsü nangzükba ama meinyaktetsü.

China nungi oset bener aruba nung saru shilem 10 aser Mexico aser Canada nungi bener aruba oset nung saru shilem 25 benoktsü atema Trump-i economic emergency sangdong. Ajisüaka Canada nungi bener aruba totzü, natural gas aser electricity nung tax ya

shilem 10 dang meshitsü. Item tariffs ya Mongulbarnü nungi mapa kuma agitsü, anungji North America nung rongsenketzüng ainba nung timtem ajurutsüsa tensa kati yoker.

Iba ya ajanga US nung kilen shia taxes nungi income nung sen \$1,170 shi akoksatsü, ta Yale nung aliba Budget Lab ajanga asadantet. Rongsenketzüng ainba tanemba akumtsü aser osettsüset nung jenjang timba akumtsü aser ano yangji Canada, Mexico aser China-i tayang kepzükra tensa kangasa mejungi akumtsü, ta The Associated Press ajanga ashi.

Fentanyl yanglua prokshiba anendaktsütsü aser ano Canada aser Mexico nungi United States telungi illegal immigrants aitba ajemdaktsütsü nükjidong nung Trump administration-i linük asem nung iba tariffs ya meshitsü lemtet.

Ketdangsur temi tariffs tasenba agientsü asoshi teinyaktsü balaka mashi saka iba mera yagi America nung fentanyl agi mesepa asüba tajemba akumtsü ta ashi.

Iba totuyuba yagi Canada nungi sen \$800 dak tajemba indang oset bener aruba nunga tax meshitsü. Tangbi sen \$800 dang tajemba oset bener United States-i aitba nung customs aser duties memeshir.

Trump-i iba mapa inyakba ajanga osettsüset nung sen kangabo metemlokdaktsütsü

asoshi pai mera balala agitar.

Kasa mapang US sorkari sangdongba tariffs nung telangzüba agütsütsü Canada renema lir, ta Canada Ato Kilonser Justin Trudeau-i Honibarnü shia liasü.

Trudeau-i pa indang social media X nung, "Asenoki iba ya maginer, saka Canada renema lir," ta ashi.

Mapang tatsüka lir Trudeau-i Trump indang tariffs nung telangzüba agüja US nungi sen \$155 billion jenjang osettsüset bener aruba nung tax shilem 25 meshitsü ta sangdong.

Mexico Tir Claudia Sheinbaum-ia X nungsa lar economic secretary dang Mexico tejangraba ama telangzüba agütsütsü totuyuba agütsüogo ta ashi.

"Mexico sorkari mapa tamajung inyakba lokti tentet den tesendaktep lir ta White House-i ashiba aser ozü litsü telungzük nung tetsüngtai aittsü tebilemba aliba onoki magizüker," ta Sheinbaum-i zülü.

"United States sorkar aser par agency temi par linük nung fentanyl amshiba nokdangnera, par yimti tulutem nung temesepba mozü ayokba anema raratsüla, koba parnoki meinyaker aser iba amala inyakshangshi nungi sen bendenba ajanga nübur nem timtem kanga agütsür," ta lai zülü.

38th National Games: Ashi Chouskey-i national record yanglu



Dehradun, Tsüklai/February 02 (Agencies): Madhya Pradesh nungi Asian Games nung bronze medal angula shooter Ashi Chouksey-i Deobarnü 38th National Games nung gold medal angutsü asoshi toktepdang tetsür 50m rifle 3 positions national record raksaja liasü.

Arishi küm 22 tain Chouksey, shibai 2023 küm Hangzhou Asian Games mapang 50m rifle 3 positions nung silver aser 10m air rifle team event nung silver ngua liasü, lai Deobarnü National Games nung 598 nguteta taoba mapang Sift Kaur Samra-i 2023 küm 594 record yanglua aliba raksatsü.

"Ni iba atema kanga meranga mapa inyakogo, aser iba tenüngsang ya kü coach, sponsors, kinunger aser tembartem densema ni yarir ajunga nem agütsür," ta Chouksey-i takok anguba sülen ashi.

"Tanü ni takok anguba nung parnok ajaki tongti shilem agiogo. Ibai ni atema tejak tentetba mapang ka lir, talisa taoba mapang ozü state nungi shinga meliasü aser tanü ni iba alizüng tongteter," ta lai ashi.

Chouksey-i kneeling, prone aser standing position tem nung tepila makai kanga junga khatet aser otsü raksatsüba ajanga linük nung rifle akhar tajungtem rongnung ka akumer.

BILEMDANGANG

"Ola ajak dang nungi tenüngsang agütsüba ola tajungba."